

野

航

史

話

野航史話序

僕自癸酉夏感奇疾誓不復讀
書嘗以潘木公爲質然呻吟之
餘聊蕭無託間復抽編但方較
是荒集不皇著述明年夏疾始

已集亦成乃攜一小姬東下自
料生平如更無事胸次頗覺有
餘但陽火觴頭與目俱楚暑路
無聊未免咄咄舊蓄二鬟久侍
筆墨知其宿痼陰令小姬叩余

史事余遂欣然爲答雖亂抽殘
帙無復條理興寄所及亦無義
例然每一論過亦自快然如吐
喉骨也兩鬟隨卽記錄旬日之
間得少許許旣抵橫塘重裝行

李乃始知之笑曰何物青衣將
破老僧戒乎然業已授簡姑置
之題曰野航史話

石民記

野航史話卷之一

防風茅元儀止生著

孔子沒其弟子立有子爲師事如孔子先時商
瞿年長無子其母爲取室孔子使之齊瞿母請
之孔子曰無憂瞿年四十後當有五丈夫子已
而果然諸弟子以問有子夫子何以知此有若
默無以應弟子起曰有子避之此非子之坐也
余以有子之似孔子正在於此使後世儒者必

測陰陽之變窮生尅之致斐然成章足以聳二三子之聽矣而有子不爲也然而有子之默有子實不知也夫子知之而門人問之亦必默不以應也

司馬季主曰伏羲作八卦周文王演三百八十四爻而天下治越王句踐仿文王八卦以破敵國句踐深於易典籍中唯見於此卽吳越春秋亦止載范少伯六壬神驗耳

褚先生曰記曰能得名龜者家必大富至千萬
一曰北斗龜二曰南辰龜三曰五星龜四曰八
風龜五曰二十八宿龜六曰日月龜七曰九州
龜八曰玉龜今人妄以玉琢龜曰此玉龜也得
之可辟兵相率以千金爲售亦何不讀書也

以人之名取言未有不悞者淳于意古名醫也
其言曰年二十是謂易賀法不當砭灸灸致氣逐
然今之年少以逮兒童因砭灸以已疾者甚夥

野航史話

卷之一

也拘儒苟以名爲符庸可旣乎

凡用人者務得其意得其意之道在不拘常格
拘常格鮮有能用人者矣漢武帝時胡建守軍
正丞貧無車馬常步與走卒起居甚得衆心會
監軍御史爲監穿北軍壘垣以爲賈區欲誅之
乃約其卒曰我欲與公有所誅吾言取則取斬
則斬衆曰諾於是當選士建從走卒趨至堂皇
下拜謁畢上堂走卒皆上建指監軍御史曰取

彼走卒輒前曳監下建曰斬之卒輒斬御史諸
護軍拔盡驚愕不知所以建則已有成奏在懷
中遂上奏監軍御史公穿軍垣以求賈利於黃
帝李法是謂姦人臣謹按軍法制可建以是顯
名

讀書不詳古人通病故建論彈駁互爭甲乙俱
在夢寐如疑獄翻案雖屢經讞決生死殊軌然
皆不察初情徒滋口舌如楊子雲之符命亦一

事也子雲符命後世以此譏之至宋儒直稱爲莽大夫爲之頌不平者言亦纍纍然亦嘗察其初乎國史曰初王莽旣以符命自立及卽位欲絕其源以神前事而劉歆子棻復獻之莽怒投棻四裔詞連及雄雄方校書天祿閣治獄使者來收雄雄懼不得脫乃從閣上自投下幾死請其故則棻嘗從雄學作奇字也有詔勿問京師爲之語曰惟寂寞自投閣爰清靜作符命如此

則作符命者劉棻也棻不過從雄學作奇字耳
雄未嘗與符命之事也故羅織如莽置之勿問
其謂雄作符命者一時譌傳輕薄之語乃不此
之論而至被譏疑無楊子雲何其讀書不詳也
漢武帝悼念李夫人令齊人少翁以術致之爲
是耶非耶之曲又封其弟廣利延年其事甚著
而史又云少翁致王夫人其說兩存殊不可解
我直疑後世抄傳魯豕之誤也

古人之技其粗者亦非今人可及也王莽募奇
技術或言能飛一日千里可窺匈奴莽輒試能
飛者取大鳥翮爲兩翼頭與身皆着毛通引環
紐飛數百步墮今有此乎余嘗見一人以大鳥
翮飛然無環紐止可踰垣耳余猶以有可用若
得數百步固軍中一奇也安可得哉

余少嘗遊吾郡峴山聞歌呼劇飲者所稱字號
皆郡之貴人也怪之旣察之乃乞兒也嘗以爲

笑既讀後漢書向翊有弟子數人名顏淵子貢季路冉有時乞食街市或悉邀乞兒同飲宿因笑吾郡乞兒固有所本也憮不以賢而以貴卑矣。

余嘗怪岐黃家製方必窮析分釐而置劑者每以手爲度必不能合欲以已疾焉得不疎古之名醫止華陀置劑心識分銖不假稱量陀能剖腹破背湔洗腸胃此可倣効乎

杜恕家戒云張子臺視之若鄙樣人然其心中不知天地間何者爲美何者可好敦然似與陰陽合德者作人如此自可不富貴禍患何從而來可謂名言

秦宓曰僕文不能盡言言不能盡意何文藻之有夫虎生而文炳鳳生而五色豈以文彩自飾哉天性自然宓文不甚見然自是文章家第一流語也

西晉石玠問袁甫曰壽陽以西何恒旱壽陽以東何恒水甫曰壽陽以東皆吳人鼎足強邦一朝失職憤歎甚積積憂成陰積陰成雨積雨成水故其域恒潦也壽陽以西皆是中國新平強吳美寶畢入志盈以滿用長歡娛公羊有言魯僖甚悅故致旱此言雖鑿似亦一理也

謝晦被誅其女爲彭城王義康妃被髮徒跣赴訣曰阿父大丈夫當橫屍戰場奈何狼籍都市

此言字字可思吾輩一日當誦三過

謝澹任俠不營當世與名士范泰爲雲霞交交
道中以此爲第一

孔靈符嘗立墅周回三十三里水陸地二百六
十五頃舍帶二山得此可以老矣

宋時元凶劭弑逆孝武起義主簿顏竣馳入見
曰劭已據有天府而四方尚未知義兵之發唇
齒不相應危道也沈慶之曰今方舉義而使黃

頭小兒皆得叅預禍至矣宜斬以徇孝武遂定策慶之謂竣曰君但主筆札他勿有所預旬日疾下遂斬元凶若慶之者老幹無枝可謂大將矣

宋明帝好園碁置園碁州邑以建安王休仁爲園碁州大中正王謐沈勃庾珪之王抗四人爲小中正褚思莊傳楚之爲清定訪問因知當時大小中正之外尚有清定訪問名目今反不著

而以圉基僭署傳故知古之逸事多矣

明僧紹棲遯齊高帝謂其弟慶符曰卿兄高尚亦堯之外臣朕夢想幽人所謂逕路絕風雲通也其言可味

蕭子雲弱冠撰晉書年二十六書成百十卷尚友古人頗讓此一頭地

王僧佑爲太子中舍人中丞沈約彈之云肆情運氣不顧朝典揚眉闊步直轡高驅我以傲得

成庶近之乎惜時無休文不得此摹擬

沈約撰晉書一百餘卷已遇盜失第五帙遂不得爲全書蓋其人雖存終不能自續也余之著述被盜屢矣故急急了小集後世當亮此

懷也

殷鈞在郡有聲郡人多病瘡自鈞至瘡竟絕余近病瘡經年頗疑來病君子偶患此言因而顧瞻桑梓當無怪也

人知狄仁傑遷湖州項羽廟不知梁蕭琛嘗厲

色曰生不能與漢祖爭中原而死乃據此廳事
耶何陋也竟遷他廟祀并絕不知何時復攘郡
舍致仁傑一篇文耶項羽在六朝時郡人號爲
憤王

劉孝綽七歲能文每作一篇朝成暮遍流聞河
朔亭苑柱壁莫不題之文集數十萬言兄弟及
羣從子姪凡七十人並能文其三妹一適瑯琊
王叔英一適吳郡張噤一適東海徐悱並著才

名而悱妻文尤清拔世稱劉三娘人家聚笏滿
牀何足爲榮若此者王謝崔盧皆出其下

王筠自撰文章每一官爲一集自洗馬中書中
庶子吏部左佐臨海太守各十卷尚書三十卷
凡一百卷行世余刻詩頗倣此但居官日淺故
渝水之外大槩患難貧賤之時然其分合亦各
自有首尾

近世一士紳歸遇僧出于妻戶謂之曰後莫復

爾聞者傳笑然亦自有本劉師知爲陳武帝弑
梁敬帝還報曰事已了武帝曰卿乃忠乎我後
莫復爾師知不對

傳緯以諫死有惡蛇屈尾來上靈牀當前受祭
酹去而復來者百許日時聞彈指戶固知嗔苟
不化忠亦爲蛇但旣已爲蛇疇復彈指此不可
解

余嘗自恨不爲縣令蓋我家祖父伯叔人人爲

循吏如陳之傳琰家世作吏多著奇績故世傳諸傳有理縣譜余家可謂不媿矣

桓冲之造一器不因風水不勞人力而施機自運又造千里船于新亭江試之日行百餘里此亦一奇也惜其法不傳矣

何敬父仕齊爲長城令義嚴一介會歲饑夏至節忽榜其門受餉數日中遂得米二千餘斛他物稱是乃悉以代貧民之不能輸租者此等事

極易爲今人却算肯

秦皇長城隋煬踵之皆萬世之利如齊文宣可
謂癡漢天子然自西河築長城東至海凡三千
餘里六十里一戍功豈可漸滅

周武帝詔曰至道宏深渾成無際體包空有理
極幽玄但岐路旣分源流逾遠淳離朴散形器
斯乖遂使三墨八儒朱紫交競九流七畧異說
相騰道隱小成其來舊矣不有會歸爭驅靡息

今可立通道觀聖哲微言先賢典訓金科玉篆
祕笈玄文有可濟養黎元扶成教義者並宜弘
闡一以貫之俾翫培塿者識嵩岱之崇崛宗磧
礫者悟渤澥之泓澄不亦可乎近世林三教乃
祖其說耳輒自標置亦云淺矣

婦人自識士者不少若識帝王者齊君王后與
齊武明婁后耳婁后更勝君后者三事強族聘
之多不肯行君后所不聞一也君后先失身于

法章妻后止使婢通意又數致私財使聘已父
母許之二也法章本應得王高歡時執役城上
耳三也固是識英雄婦人第一

高閭在齊孝文時上備邊策曰築長城計六鎮
東西不過千里若一夫一月之功當二步之地
三百人三里三千人三十里三萬人三百里則
三百之地強弱相兼計十萬人一月必就此可
永式蓋每里一百八十步其曰二百步者舉其

成數也

羊烈家傳素業閨門修整一門女不再譙嘗于
兗州造一尼寺凡女之寡居無子者並出家爲
尼肅守戒行夫女不再譙易也使寡居爲尼肅
守戒行其難矣乎

火燒張彝宅賀六渾之所以生心也然當時尚
收執八人今并此不可得英雄能無歎乎

邢劭藏書極多而不甚讐較每見人較書笑曰

何愚之甚天下書至死讀不可遍焉能較此唯
日息悞書更是一適耳近世謝肇淛方伯家藏
書頗富而抄本未曾加較至不可讀此抄書未
曾讀耳讀之當悶死豈能適哉

余少時嘗月夕欲泛西湖無從覓篙師乃棹所
蟻舟往還投數十青蚨于船同遊者笑其迂余
以自不媿也鹿愈嘗舟行詣徐至大梁而眺從
者上岸竊禾四束飼馬行數里愈覺卽停船持

縑三丈還至斫禾處置之而還古之迂人當不
乏也

邢子廣謂盧詢祖有規簡禰衡盧思道無米稜
文舉其言可息世間不成格名士大約如此

魏收爲魏書時稱穢史至投牒者百數然史所
譏指况爾朱榮爲韓彭伊霍則不然其原文云
若修德義之風韓彭伊霍亦何足數此深譏直
貶之詞何云曲筆也

世每言楊素散車爲騎以勝突厥此讀史者之
麤心也史曰開皇中突厥達頭可汗犯塞命素
討之先是諸將慮胡騎奔突皆戎車步騎相叅
以鹿角爲方陣騎在內素曰此可自固耳乃悉
除舊法令諸軍爲騎陣達頭聞大喜以爲天賜
下馬拜天及戰素奮擊衝突任意破其十萬衆
此着緊處在奮擊衝突耳苟不能奮擊衝突不
如自固之愈耳蓋素用法嚴每戰先使一二百

人陷陣如回必人人就戮故能用衆奮擊不然則達頭之拜天未爲妄也況今之兵恨不能固固則火器壘出不患不勝又非管比尚可言解車爲騎乎

天下戶口不入版籍未有如今日之甚者也今急當澄此以均民力而有司憚于不得要領余以裴蘊在隋時奏令有司親簡閱又使民互糾得一丁被糾之家代輸賦稅于是郡縣上計增

丁二十四萬三千新附口至六十四萬一千五百此法可做也而夏益以先自手實之法使人畏糾而代輸夏易爲力矣

天下不近人情者則必險陋古今一轍田式仕隋文帝女壻杜寧自長安來省或扇之內齋久不得還竊上北樓以檄羈思式知之杖寧五十每赦書到必先召獄卒盡殺諸重囚而後宣讀尋被譴除名或恚甚不食至索椒欲自殺椒不

得則陰遣侍僮市毒藥妻子奪棄之怒臥不起
其子勸之抽刃斫焉急避刃中門得免此其不
近人情果于酷虐止爲保此官耳不得官則憤
怒求死固一致也

野航史話卷之一終

野航史話卷之二

防風茅元儀止生著

馬嗣明隋名醫也楊愔嘗患背腫嗣明以鍊石
塗之立愈鍊石法以麤黃石如鵝鴨卵大猛火
燒令赤內淳醋中自有石屑落醋內頻燒至石
盡取石屑曝乾擣下鉢和醋塗腫上無不卽差
者此方今醫不知用當廣布之也

王微嘗言文情不怨思抑揚則流澹無味自是

解人語

張敬兒仕南齊歷位開府武帝立不蒙勞問心
疑之妻謂曰管吾夢手熱如火而君得南陽已
夢半身熱而君得本州乃今復夢舉體熱矣未
幾被收蓋熱極則焚矣其半身熱手熱者禍之
幾也不至開府則不收不歷南陽本州則不至
開府然福之兆未有不爲禍之幾者也故禍之
幾人嘗悞以爲福之兆

王裕事宋與徐傳同朝而絕不一詣子瓚之仕
齊與柳元景顏師古同朝而亦不一詣孫秀之
褚淵欲約婚而不肯蓋三世不事權貴余王父
一忤夏言再悞嚴嵩三忤徐階遂以三黜先君
爲臺諫不肯低眉時貴仕垂三十年終于正郎
余不肖而觸忤貴人則云屢矣雖牢落至此自
謂可與秀之一門同傳也

四夷里數與中夏長短懸殊中夏斤兩衡度俱

至不齊而獨里爲百八十步則古今如一獨北
魏書云宣武帝射遠及一里五十步實計三百
五十餘步此不可解當是夷論未銷除耳

北魏羅結任侍中都大官總三十六曹事時年
已一百七歲後除長秋卿典後宮出入時年一
百一十始聽歸老年一百二十卒賜第東川并
爲築城名羅侯城觀此則宋文潞公九十在朝
近日王少師八十四罷仕政未艾也

古人一斛有十斗者有五斗者如高允所論之
方一里爲田三頃七十畝百里則田三萬七千
頃若勤之則畝益三升不勤則畝損三升方百
里損益之率爲二百二十萬斛此以五斗爲斛
也

客有謂賈思伯曰公今貴重寧能不驕思伯曰
衰○至○便○驕○何○常○之○有○世○以○爲○雅○談○不○直○雅○談○良
至論也

近世董斯張有書名掌記後夏廣博物志余甚
懼此書難廣然亦彬彬可觀也北魏常景性好
異書嘗有刪正博物志惜不得見耳

均田之法唐尚不廢以後遂無王田之說矣然
考之北魏諸男夫年十五以上受露田四十畝
婦人二十畝奴婢依良下牛一頭受田三十畝
諸民年及課則受田身沒則還田受田者種桑
五十樹棗五株榆三根限三年種畢不畢奪其

不畢之地于桑榆地則雜時餘果多種桑榆者
不禁諸應還之田不得種桑榆棗果諸桑田皆
世業身終不還盈者得賣不足者得買不得賣
其則亦不過買諸土廣民稀之處諸地狹之處
諸無桑之處諸舉戶老小疲癯者諸寡婦守志
者諸受田而身亾及買賣奴牛者諸移徙他鄉
與徙而新居者諸流配遠謫與戶絕無人者一
一各有區畫制極周悉其諸宰民官各隨地給

公田、刺史十五頃、太守十頃、治中別駕各八頃、縣令郡丞各六頃。夏代相付賣者，坐如律考之。唐制度田以步，其闊一步，其長二百四十步爲畝，百畝爲頃。凡民始生爲黃，四歲爲小，十六爲中，二十一爲丁，六十爲老。授田之制：丁及男年十八以上者，人一頃八十畝；爲口分，二十畝爲永業。老廢疾者，人四十畝；寡妻妾，三十畝。當戶者，增二十畝；皆二十畝爲永業，其餘爲口分。永

業之田樹以榆棗桑及各所宜木皆有數諸鄉
有寬狹地有肥瘦人有死徙者倍半買賣各有
限制自王公以下皆有永業田此制永廢人不
知寸土皆王田矣惟開創之主尚可覺斯民
魏孝文延興三年秀容郡婦人一產四男四產
一十六男此較周八士又倍之矣

儒者痛詆寇謙之誤魏太武然謙之卒也口中
氣若煙雲然從牕出上至天半乃滅尸體引長

弟子量之八尺三寸三日忽復漸縮僅六寸許見之史傳豈其徒之妄說耶

北齊南陽王綽生於五月五日辰時後主生于五月五日午時綽後見殺經四百餘日始大斂色如生俗云五月五日生者尸不壞

元世哲弟黃頭與諸囚自金鳳臺各乘紙鴟以飛黃頭獨至紫陌乃墜此法今亦不傳矣

北魏氏族法凡三世有三公者曰膏腴有令僕

者曰華腴尚書領護而上爲甲姓九卿方伯爲
乙姓散騎常侍太中大夫爲丙姓吏部正員郎
爲丁姓如此則本朝身至三公三世者竟無其
人膏粱絕矣華腴亦數家耳選舉日以公世官
日以廢人才日以弊不知其孰是也

齊文宣時元文遙爲楊愔所器每云堪解纓侯
印者必此人也一日忽被中旨幽執莫知其故
已文宣忽自詣獄執其手謝親解御服及金帶

賜之卽日起尚書祠部郎尋叅軍國大事唐太

宗貶褚遂良

李世勣

以貽其子文宣則身抑而身揚之

矣雖非中道然文遙頗爲盡力亦駕馭一

策也

周李遷哲世爲山南豪族歸朝累戰功都督七
州軍事爵安康郡公性華侈厚自奉養姬妾至
百數生男女凡六十九緣漢千餘里間第宅相
次令姬人有子者分處其中遷哲往來遊幸鳴
笳導從縱酒醺酣極生平之樂子孫叅見或忘

其年名者披薄審之此人福澤非常氣局亦包
絡一世矣

隋志曰淫蛙之音能使骨騰肉飛此文筆亦有
天際飛花之致

隋志曰豫章衣冠之人多有數婦暴面市廛競
分銖以給其夫及舉孝廉則受娶富戚前妻雖
有積年之勤子女盈前猶見放逐則近時習于
禮義不可謂非理學之漸摩也

唐李文博鯁介清廉薛道衡奏爲從事嘗詣房
玄齡玄齡謂曰公平生志尚唯枉正直今旣得
爲從事故應會此素心比來激濁揚清所爲多
少文博奮臂厲聲曰清流者必潔其源正末者
須端其本今源混本亂雖日免十貪郡守亦何
所益玄齡爲之悚然答 熹宗之世權璫雖恣
意威劫然其意在責下以廉至于 聖明當御
夏惓惓于激揚而貪風益熾民愈不堪治亂不

同同歸于源混本亂也執要之術孰爲剛主
一敷陳哉孤臣淚漸此牘矣

唐麥鐵杖一健兒起家耳遼東之役請爲前鋒
顧謂醫人吳景賢曰大丈夫性命自有所在豈
能艾炷炙額瓜蒂顛鼻治黃不差而死兒女手
中耶彼尚如此何況我輩

陳至德初韋鼎盡貨田宅寓居僧寺友人毛彪
問其故答曰江東王氣盡於此矣吾與爾皆當

葬長安期將及故破產束裝耳此人無大名亦
尚與荀魯同見吾輩終日碌碌異日盜賊焚其
廬燼其先人遺編笑曰夫夫空負早見徒虛語
耳豈不媿死

唐天文志曰吳中常侍王蕃考先儒所傳以戴
日下萬五千里爲句股斜射陽城考周徑之率
以揆天度當千四百六里二十四步有餘今測
日晷距陽城五千里已在戴日之南則一度之

廣皆三分減二南北極相去八萬里其徑五萬里宇宙之廣豈若是乎然則蕃之術以蠡測海者也古人所以恃句股術謂其有證於近事顧未知目視不能及遠遠則微差其差不已遂與術錯譬遊于太湖廣袤不盈百里見日月朝夕出入湖中及其浮于巨海不知幾千萬里猶見日月朝夕出入其中矣若干朝夕之際俱說重差而望之必將大小同術無以分矣橫既有之

縱亦宜然又若樹兩表南北相距十里其崇皆數十里置大炬于南表之端而植八尺之木于其下則當無影試從南表之下仰望北表之端必將積微分之差漸與南表叅合表首叅合則置炬于其上亦當無影矣又置大炬于此表之端而植八尺之木于其下則當無影試從北表之下仰望南表之端又將積微分之差漸與北表叅合表首叅合則置炬于其上亦當無影矣

復於二表間更植八尺之木仰而望之則表首
環屈相合若置火炬於兩表之端皆當無影矣
夫數十里之高與十里之廣然猶斜視之影與
仰望不殊今欲憑畧差以指遠近高下尚不可
知而況稽周天里步於不測之中又可必乎此
論破的天文家所當奉爲指南也

代宗生母吳后及卽位上尊號啓故寔祔葬則
貌若生衣成赭色貌若生者靈矣衣成赭誠異

事也

每怪大第貽後人人不能守而呂丞相爲宰相
廳事不足爲太祝廳事有餘之語似止爲子孫
計而身之榮顯反置上恩於不問者亦似非中
道獨唐河間王孝恭云我所居頗壯麗要非我
心當別營一區令粗足充事吾歿後子也才易
以守不才不爲它人所利此其言差當但君子
素位而行身爲郡王大將壯麗亦宜何必謂要

非我心子孫正宜有素位處既無世爵世勲不
得不別有以傳之耳其守不守亦何足介意
人主假少君之術以見所嬖者有矣無如唐太
宗假以見馬周真君臣知契千古一人也

張玄素孫伏伽俱于隋爲令史唐太宗訊之伏
伽雖在廣坐而陳說往事略無隱諱玄素顏若
死灰精爽頓盡如此氣量却亦直諫顯太宗之
訊正窺其不足也

天下固有以抑而得恕雖極惡而姑容者極多也如唐中宗曰朕以天下與韋玄貞亦何不可裴炎程務挺佐武后廢之伊霍一流也僭武后太不理于人口故中宗得復辟耳二子未可盡非也

唐肅宗時十月丙申有星犯昴韋見素言于帝曰昴者胡也祿山將死矣帝曰日月可知乎見素曰福應在德禍應在刑昴金忌火刑當火位

昴之昏中乃其時也既死其月亦死其日明年
正月甲寅祿山其殪乎帝曰賊何等死對曰五
行之說子者視妻所生昴犯以丙申金木之妃
也木火之母也丙火爲金子申亦金也二金本
同末異還以相尅賊殆爲子與首亂者更相屠
戮乎及期祿山死占驗之道雖多端不出五行
之理五行無死數在意以神明之通此數語者
三式天官風角充棟俱可束之高閣

韋陟常以五采綵爲書記使侍妾分主報答惟授意而已書皆有楷法陟唯署名從來受用姬妾風雅此爲第一

吳至永嘉而盛然在唐猶未及今也卽以一事觀之玄宗時韋堅于廣運潭聚舟三百每舟署某郡卽以某郡物產暴陳其上廣陵則飾銅器官端綾繡會稽則羅綾絳紗南海則玳瑁象齒珠琲沉香豫章則力士磁酒茗鐺釜宣城則空

青石綠始安則蕉葛蚺膽翠羽吳郡則方文綾
一物而已使在今日吳物當居天下大半矣它
物如故獨豫章力士今不見

李聽晟之子盛飾服玩或誠之聽曰家聲在人
若示衰薄何以見忠功之效吾故欲誇而勸之
也此大豪傑識量亦純忠臣氣槩可媿殺沽名
酸子數百輩聽又好方書擇其驗者題于帷帟
牆壁間皆滿我所輯方書成當名曰李公帟

嘗疑唐玄宗時蜀中荔枝七日至秦似非人力
按當時明州歲貢淡菜蚶蛤之屬白海道抵京
師役人凡四十三萬此亦何難今國家玉食萬
方其所謂進鮮者迂迴時日大率過時民亦不
知勞 祖宗德澤深矣

鄭注能以餌黃金起李愬痿今方術亦不知此
方矣

歐陽詢晚自矜重其書徑毛爲筆覆以免毫非

是未嘗輒書今天下無筆不如此可知古人朴也

李林甫作相時張九齡裴耀卿爲左右相每就位二人磬折趨而林甫在中獨軒騫無少讓時謂一鵬挾兩兔此似可保全矣然林甫特以陰狡傾二人而二人不知也未幾罷夫九齡輩幸爲林甫傾耳不然何以自解天下後世卽磬折終不免何苦多此醜態勁骨者尚如此何況今

之斗筭

自古英雄未有不憐才根于天性者李克用一
健兒天子耳李存孝雖甚勇然背晉歸梁又爲
書檄罪克用車裂以徇豈足爲苛然克用惜其
才悵恨久之爲不視事者十日此人焉得不爲
天子

野航史話卷之二

終

野航史話卷之三

防風茅元儀止生著

五代時朱瑾事楊行密嘗病疽醫視之色懼瑾
曰但理之我非以病死者及徐溫父子專政瑾
謀誅之被殺瘞廣陵北門是時民多病瘡取瑾
墓上土以水服之病輒愈身知不以病死死後
墓土尚能已病真快士也

袁象先平生積財數十萬邸舍四千間其卒也

不以分諸子而悉與其子正辭正辭守父積錢
室中嘗有聲如牛人以爲妖勸其散積以禳之
正辭曰吾聞物之有聲求其同類耳宜益以錢
聲必止象先初尚梁太祖姊爲宋州十餘年歛
積踰千萬梁滅輦金數十萬賂唐宰相伶官宦
者及劉皇后以是莊宗厚遇之正辭在唐廢帝
時獻錢五萬緡領衢州刺史石敬瑭立亦獻五
萬緡授雄州刺史雄在靈武西界鄰吐蕃不欲

行復獻錢數萬乃得免正辭不勝忿至以衣帶
自縊出帝憐之方欲與一內郡而正辭卒今有
財者大要得此效何怪舉世積歛故曰錢之神
世之衰也

張筠起家富賈事唐明宗爲河南尹弟錢爲京
兆尹筠初嘗代康懷英爲永平而懷英死筠卽
掠其家貲又于唐故宮掘地得藏金玉甚盛又
裨將侯莫陳威者嘗與溫韜發唐諸陵分得多

寶筠以事殺威亦盡取之魏王繼岌死渭南錢
悉取其行橐王衍自蜀入行至秦州宦者向延
嗣殺之盡取衍珍寶已明宗遣人誅宦者延嗣
亡命而珍寶又盡爲錢取以是筠錢兄弟積貲
累鉅萬然筠好施而錢鄙嗇筠後以市馬不中
式有司理其價直鬱鬱死而錢擁其貲以酒色
聲妓自娛享樂十餘年人謂之地仙天之報施
安在哉人安得不損廉去恥而求富足耶故曰

不咎人而咎天

故事知舉官將赴貢院得薦所知號曰公薦宋太祖慮其夤緣挾私禁之然宋以前得士較宋以後得士孰多故曰法立而弊滋上疑下而下之報上愈薄

余嘗有句曰曹公亦是青州帥光武初推銅馬君宋史曰建炎南渡收潰卒招羣盜以開元帥府故流賊至百萬終不可盡殺亦不能歸南畝

惟有收爲兵然非創業中興亦不能區處餉若建炎者其善散之尤者也

南宋士大夫不服本等公服及分色樣唯服紫戎衫以爲便當時軍事倉卒高宗之吳后常以戎服侍從況于人臣乎

党進武人而麤名進其自稱每曰暉人問之則曰吾從吾便耳此人大解脫與女妖題詩署我者一意

竇貞固唐五代時位三公少時中蟲若有物贅
在喉間哽闕及爲相日偶大吐一物落銀盤中
狀如蜥蜴毒氣蒸衝時命斃於中衢臭聞百步
外人苟當貴達蠱不能害又何憂於人

宋綬宋人也嘗補唐武宗以下實錄百四十八
卷本朝修元史者皆勝國遺老凡所殘缺不能
補一字何也豈時爲之歟

宋時以文臣爲監軍然嘗稱副蓋從古監軍稱

副也國初文臣曰贊理曰叅贊亦其遺意且置之幕寮上佐之間并監之名不設矣今文臣爲帥將反爲屬不則亦爲雌監司稱監軍亦未肯居于副况御史乎如漢時軍正丞猶得斬監軍御史後絕不聞矣以此而求戰勝攻取雖黃帝復生有所不能也

余嘗言鬻官之弊久矣價錢而人冗未有如今日者也觀范純粹疏云今西北三路凡納三千

二百緡者許買齋郎四千六百緡者許買僕奉
並免試注官天下士大夫有服勤至死猶不得
霑世恩者而富民猾商捐錢千萬卽可任三子
竊爲朝廷惜之當時所納止于九品虛銜價猶
如此今豈非徒受其弊乎 主上毅然止之聖
政也士大夫反欲開納亦不思甚矣

李大臨知汝州辰溪貢丹砂道葉縣其二篋化
爲雙雉關山谷間耕夫獲之貢者指爲盜械送

于府大臨能辨其異立釋耕者此博物者所當知也

孫覺事宋神宗直諫院嘗以言事忤旨詔奪兩級故事諫官有出外無降官理覺遂連章丐去曰去歲有罰金御史今茲有貶秩諫官未聞罰金貶秩而猶可居位者因出判越州蓋先是中丞趙挺之以論事罰金陸佃爭之謂中丞不可罰罰則不可爲中丞今熹廟時臺官十九加

銜世謂之凸近年臺諫俱鑄級世謂之凹今臺諫求得鑄級不外調以爲幸聞覺之言能無歎乎

虞策在宋徽宗時疏請節用其略曰臣比在戶部見中都經費歲六百萬與天下上供之數略相當嘗以祖宗故實考之皇祐所入總三千九百萬而費纔三之一治平所入四千四百萬而費五之一熙寧所入五千六十萬而費盡之今

諸道隨一月所須旋爲裏會汲汲然不能終日
願深裁浮冗以惜物力李迨于宋高宗時爲四
川都轉運使踰年詔迨具每歲收支之數以聞
迨爲考其本末具奏紹興四年所收錢物三千
三百四十二萬餘緡此所支關五十一萬餘緡
五年收三千六十萬此所支關一千萬餘緡六
年未見七年所收三千六百六十萬餘緡此所
支關一百六十一萬餘緡自來遇歲計有闕卽

添支錢引補助紹興四年添印五百六十七萬
道五年添印二百萬道六年添印六百萬道見
今泚料太多引價頓落緣此未曾添印兼歲收
錢物內有上供進奉等窠名一千五百九十九
萬係四川歲入舊額其勸諭激賞等項窠名錢
物共二千六十八萬係軍興後來歲入所增比
舊額過倍其取于民可謂重矣臣嘗考劉晏傳
是時天下歲入緡錢千二百萬而筦榷居其半

今四川榷鹽榷酒歲入一千九十一萬過于晏
所榷多矣諸窠名錢已三倍劉晏歲入之數彼
以一千二百萬贍中原之軍而有餘今以三千
六百萬贍川陝一軍而不足又加折估及正色
米一項通計二百六十五萬石臣以紹興六年
朝廷取會官兵數計之止六萬八千四百四十
九人決無一年用二百六十五萬石米之理數
內官員一萬一千七員軍兵五萬七百四十九

人官員之數比官兵之數約計六分之一卽是
冗濫在官員不在軍兵也計司雖知冗濫力不
能裁此朝廷不可不知也此一爲北宋之末一
爲南宋之始宋之國計大約可見矣余之徵討
錄獨取於宋以其近於今也此亦大約矣

鄧肅自幼與李綱爲忘年交綱罷肅上疏曰綱
學雖正而術疎謀雖深而機淺二語足槩綱生
平可謂知己矣學正術疎人所易知謀深機淺

此前者所未發也

王安石經學敗於楊時而成於王居正時嘗出
所著三經義辨以示謂曰吾舉其端子成吾志
居正感勵首尾十載爲書辨學十三卷詩辨學
三十卷周禮辨學五卷辨學外集一卷居正書
旣進楊時三經義辨亦列祕閣二書行天下遂
不復言王氏學今王氏書與駁正王氏書俱不
流傳亦千古一恨也

紹興三年以地震求言洪擬上言曰法行公則人樂而氣和行之偏則人怨而氣乖比者監司守臣獻羨餘則黜之宣撫司獻則受之是行法止及疎逖也有自庶僚爲侍從者臥家視職未嘗入謝若鼓院官移疾廢朝叅則斥罷之是行法止及冗賤也酒酤立法甚嚴犯者藉家財充賞大官勢臣連營列障公行酤賣是行法止及賈堅也此言甚中今日之病當亦是古今通病

耳

畏用曉
衝突以目
大

宋人張威自行伍充偏裨戰必克金人憚之荆
鄙多平野利騎不利步威曰彼鐵騎一衝則吾
技窮矣乃以意創散星陣分合不常聞鼓則聚
聞金則散每騎兵至則聲金一軍輒分數十族
金人隨分兵則又鼓而聚之倏忽間分合數變
金人失措然後縱擊之以此輒勝其臨陣戰酣
精采愈奮則兩翼張紅眼又號張鵠

眼每戰不操他兵有木梃號紫大蟲揮之掠陣
敵無不披靡者其軍行必銜枚寂不聞聲此真
名將也名不甚著當表而出之

唐璘爲御史論宰相以時文之才爲維世之略
其言甚可思

宋楊揆本書生工詞賦倜儻任俠嘗貸人萬緡
遊襄漢間入倡樓篋垂盡夜忽自呼曰來此何
爲輒棄去已在叅軍杜杲幕能出奇計解安豐

之圍在軍中嘗費錢數萬賈似道核其數孟珙以白金六百兩與償揆又費之終酣飲似道欲殺之揆曰漢高祖以黃金四萬斤付陳平不問出入如公瑣瑣何以用豪傑似道姑置之揆初從戎習騎射每夜用青布籍地乘生馬躍初不過三尺次五尺次至一丈數閃跌不顧孟珙嘗用其法以爲小子房此真奇士將宋人酸腐氣盡洗淨此等人似道尚能姑置之今之賢者未

知如何矣其躍馬法孟瑛老將反取資之固知可爲永法也

南宋張惟孝慷慨負奇自襄避亂江陵幹官鍾蜚英見而奇之以告宣撫姚希得希得晏之仲宣樓酒酣謂曰世事如此奈何不出惟孝不答再叩之則曰朝廷負人蜚英曰有國而後有身惟孝乃躍然起曰惟命卽請空名帖三十道還逾旬與三十騎俱擁精甲五千至希得大驚喜

會鼎澧五州危甚惟孝率衆往援戰屢捷帝得
爲請所部姓名答曰朝廷負人福難禍易聊爲
君侯紓一時難耳姓名不可得也未幾遁去物
色之不可得或云趨淮甸不知所終此大奇士
余嘗選千古功名之士以樓三層祠之唯范少
伯張子房李長源居最上此君亦其流亞歟
短喪之制人以爲始于漢文帝嘗爲不平漢文
知時不能久故申言之實稍加于晉而後世宥

于黃老之術而不知也宋人李性傳嘉定中疏
曰東周而後諸侯卿大夫皆以旣葬除服秦漢
之際尤爲淺促孝文定爲三十六日視孝惠前
差有加矣至東漢後又損爲二十七日謂之以
日易月則薄之至也千數百年惟晉武帝魏孝
文能復古制而羣臣沮格未克盡行惟我孝宗
通喪三年近古所獨陛下繼之克篤前烈乞以
此疏付之史官庶幾四海嚮風民德歸厚此疏

可爲此事信史

徐霖嘗上疏言史嵩之奸狀略云嵩之先奪陛下之心其次奪士大夫之心而其甚也至奪豪傑之心今日之士大夫嵩之皆變化其心而收攝之矣變化之術甚祕非章章然號于人使爲小人也每于善類中擇其質柔氣弱而易奪者親任一二視其稍稍異已卽排斥而擯逐之風其餘此術小人工用不獨一嵩之也觀之能無

愧乎

朱仲晦疏云今之在位以金珠爲脯醢以契券爲詩文真亂世確症也萬曆初江陵不惡諛言士大夫工啓事以爲媚近有復循此者偏召名士頗費心力裂而還之終致于理彼無啓而金珠者皆高擢矣

喻樗字子才精賞鑒宣和間嘗謂友人沈晦誠進士當第一建炎初又謂今歲進士張九成當

第一凌景夏第二會風折大槐樗以作二簡遺之未幾果然趙鼎嘗以樊光遠免舉事訪樗樗曰方今省試不可無此人于是光遠亦第一初樗二女方擇配富人爭請婚不許及見汪應辰張孝祥曰佳壻也遂妻之兩人俱擢進士第一此人可謂慣識狀元幾與賣平天冠者同一生意稍不冷落絕耳

宋人張愈初負大志嘗請使契丹欲令夷狄自

相攻以完中國之勢其論甚壯屢舉不第用薦
除較書祕閣辭弗就隱于家喜奕棋樂山水每
逢興劇雖數千里必盡室往遊于是浮湘沅覽
浙江升羅浮入九疑所至必買石載鶴以歸歸
而杜門著書其所居爲青城山之白雲谿杜光
庭故址也妻蒲氏亦有文愈卒蒲爲之誄誄曰
高視往古哲士實殷施及秦漢餘烈氤氲孰謂
今世亦有其人其人伊何白雲隱君嘗曰丈夫

趨世不偶仕非其志祿不可苟營營末途非吾
所守吾生有涯少實多艱窮亦自固困亦不顛
脫簪散髮眠雲聽泉有峰千仞有谿數曲廣成
遺址吳興高躅疏石通徑依林架屋麋鹿同羣
晝遊夜息嶺月破雲秋霖灑竹清意何窮真心
自得放言遺慮何榮何辱孟春感疾閉戶不出
豈期遂往英標永隔抒詞哽噎揮涕汎瀾人誰
無死惜乎材賢已矣吾人嗚呼哀哉吾終不遂

亦可與斯人千古爲匹耶

野航史話卷之三

野航史話卷之四

防風茅元儀止生著

尹洙之兄尹原嘗作唐說其略曰世言唐所以
亾絲諸侯之疆此未及理夫弱唐者諸侯也唐
旣弱矣而久不亾諸侯維之也燕趙魏首亂唐
專地而治若古之建國此諸侯之雄者然皆恃
唐以爲重何則假王命以制則順而易唐雖病
之亦不得而外焉故河北順而聽命則天下爲

亂者不能遂其亂河北不順而變卽姦雄附而
起德宗之世朱泚李希烈始僭而終敗亾田悅
降于前武俊順于後也憲宗討蜀平夏誅蔡夷
鄆兵連四方而亂不生卒成中興之功田氏稟
命王承宗歸國也武宗將討劉氏之叛先正三
鎮絕其連衡之計而王誅以成如是二百年姦
臣逆子專國命者有之夷將相者有之而不敢
窺神器非力不足畏諸侯之勢也雖廣明之後

關東無復唐有而方鎮相侵伐猶以王室爲名
及朱溫舉河南劉仁恭戰敗羅氏內附王鎔請
盟則河北之事去矣梁人一舉代唐而諸侯莫
能與之爭其勢然也向使以僖昭之弱乘巢蔡
之亂而田承嗣守魏王武俊朱滔據趙燕疆相
均地相屬其勢宜莫敢先動况非義舉乎如此
雖溫之暴不過取霸一方耳安能禪天下故唐
之弱以河北之強也唐之亾河北之弱也此論

甚異而確談世變者不可不知也

天水碧余嘗以名馬然宋南渡時以餘不溪水
染二蠶絲故以得名先以南唐時李煜妓妾常
染碧色經夕未收令露下色愈鮮煜愛之自是
官中兢收露水染碧衣謂之天色碧一曰宋亡
之兆一曰滅于宋之兆皆好事者之口也

南唐史虛白字畏名世家齊魯虛隱居嵩少著
書中原喪亂與北海韓偓載來歸時烈祖輔吳

方任用宋齊丘虛白誦言曰吾可代彼齊丘不
平欲窮其技能召與晏飲設倡樂奕棋博戲酒
數行使製書檄詩賦碑頌虛白方半醉命數人
執紙口占筆不停綴俄而衆篇悉就詞采磊落
坐客驚服虛白數爲烈祖言中原方橫流獨江
淮豐阜兵食俱足當長驅以定大業毋失事機
爲他日悔烈祖不能從虛白乃謝病去南遊至
九江落星灣因家焉常乘雙犢版轅掛酒于車

上小童總角負一琴一酒瓢以從往來廬山絕
意世事保大初熈載爲史館修撰薦虛白可用
元宗召見訪以國事對曰草野之人漁釣而巳
安知國家大計賜宴便殿醉溺于殿陛元宗曰
真隱者也賜田五頃放還山及元宗南遷豫章
次蠡澤虛白鶴裘藜杖迎謁道旁元宗駐驛勞
問曰處士居山亦嘗有所賦乎曰近得谿居詩
一聯使誦之曰風雨揭却屋渾家醉不知元宗

變色厚賜粟帛上樽酒徐鉉高之謂之曰先生
高不可屈肯使二子仕乎虛白曰野人有子賢
則立功業以道事明主愚則負薪捕麋以養其
母僕未嘗介意也不敢以累公鉉媿歎卒年六
十八將終謂其子曰官賜我美酒飲之略盡尚
留一榼吾死置藜杖及此酒于棺中四時勿用
祭享無益死者吾亦不歆子皆從之孫溫天聖
中仕爲虞部員外郎獻虛白文集仁宗皇帝愛

之追號虛白冲靖先生此人可謂真隱此隱可謂卷而懷之史所稱隱逸我不敢盡然也

王彥儔蔡州上蔡人少爲州軍較唐同光末諸郡多亂彥儔亦樂禍患奮會同列六人者來與謀曰四郊恟恟能者得富貴我輩不可後人彥儔許諾且曰今夕吾直府中公等可持兵來吾亦裹甲爲內應旣夜六人者如約俱至彥儔使壯士盡捕斬之將其首叩帳門告刺史曰姦盜

竊發幸已伏誅懼有佚黨爲變願公亟號令以
安衆心刺史驚喜而出彥儔卽斬之歸其罪于
六人者翼日悉族六家據蔡州無敢動唐兵來
討彥儔自計不能守匿其妻子于村舍奉父母
來奔烈祖輔吳以爲都押衙歷和州刺史始遣
間使迎妻子南歸彥儔有政績善撫境內和遂
爲富州入拜統軍自以發迹兇亂于是務爲恭
謹烈祖嘉之嘗陞堂拜其父開國以爲池州節

度使常夢錫自給事中以直諫貶判官彥儔事
之如在朝廷人士稱之卒于鎮此人大黠黠極
便亦快

南唐陸昭符爲常州刺史一日坐廳而雷雨暴
至電光如金蛇繞案吏卒皆震仆昭符不憚撫
案叱之雷電遽收及舉案唯得鐵索重百斤昭
符亦不變色徐命舉索納庫中此亦異事當爲
格物者立一案也

南唐盧文進仲女有才色能屬文號女學士余嘗論女狀元女較書等此亦足補一事

南唐張易通判歙州刺史朱匡業平居甚謹然醉則使酒陵人果于誅殺無敢犯者易至赴其宴先已飲醉就席酒甫一再行擲杯推案攘袂大呼詬責鋒起匡業尚醒愕然不敢對惟曰通判醉甚不可當也易巍然喑鳴自若俄引去匡業使吏掖就馬自是見易加敬不敢復使酒郡

事亦賴以濟余嘗用此法以禦亾友鄒公履古
人有得我同者良快良快

周俊攻南唐淮南郭廷守濠州籍州民不逞者
聚于僧寺嚴兵守之日給食隨所能使造守具
故周師終不知城中虛實久不可下此守城者
所當法也

南唐故事試進士中選者主司必延之陞堂置
酒此猶盛世造士遺風也今亦不可得矣

南唐劉承勲爲德昌宮使宮簿煩委無繇勾較承勲獨任其事盜用無算保大後貢奉事興倉猝取辦愈得以爲姦利畜妓樂數十百人每置一妓價數十萬教以藝又費數十萬而服飾珠犀金翠稱之又後以寶貨賂遺權要故終無發其罪者太祖平荆湖詔江南具舟漕其米入京師承勲狡黠計後主終不能有其國欲預自結中朝爲異時計乃請行督巨艦自長沙抵迎鑾

千柁相銜太祖覺其意而惡之及國亾承勲歸
京師首自陳漕米事太祖曰此汝主勤王耳汝
安得有勞此出特命勿敘用久客無資裸袒乞
食不勝凍餒而死此事天甚快可爲姦人劈頭
一砭

偏霸英雄有盛世開基所不及者如南唐烈祖
嬖後宮种時光受禪後得一子甚愛之他日幸
齊王宮遇王親理樂器大怒數日未解种氏負

寵輒乘間言景遏才過齊王烈祖正色曰子有
過父教之常理也若何敢爾叱下殿去簪珥幽
于別宮數月命度爲尼景遏愛亦弛終烈祖世
獨不封爵此不在漢高上耶

南唐耿先生者父雲軍大較耿少爲女道士玉
貌鳥爪常着碧霞帔自稱比丘先生始因宋齊
丘進常見宮婢持糞埽謂元宗曰此物可憐勿
令棄之取置鐺中烹鍊良久皆成白金嘗遇雪

擁鑪索金盆貯雪令宮人握雪成錠投火中徐
舉出之皆成白金指痕猶在又能燭麥粒成員
珠光彩粲然奪真大食國進龍腦油元宗祕愛
耿視之曰此未爲佳者以夾縑囊貯白龍腦數
觔懸之有頃瀝液如注香味逾于所進遂得幸
于元宗有娠將產之夕雷雨震電及霽娠已失
矣久之宮中忽失元宗母宋太后所在耿亦隱
去幾月餘中外大駭有告者云在都城外二十

里方山寶華宮元宗亟命齊王過遂往迎太后
見與數道士方酣飲乃迎還宮道士皆誅死耿
亦不復得入宮中然猶往來江淮後不知所終
此事有二異耿先生已有道術而尚與人主交
一異也一國之母爲道士所淫樂經月二異也
國之將亾妖孽生焉此之謂歟

金泰和九年省臣奏科場搜簡至解髮袒衣索
及耳鼻非待士禮查大定故事第令舉子就沐

浴室官置衣爲更衣既可防濫又不失體上從之禮失而求諸夷可勝慨乎

金哀宗在蔡忠孝軍提控李德以月糧不優率十餘騎入省叫呼幾于罵詈仲德聞大怒縛至杖之六十上謂曰時方多難卿何不少忍仲德曰錄功隱過自是主恩若將帥之職則不然小犯則決大犯則誅強兵悍卒不可使一日不在紀律前睢陽之禍豈獨奴罪亦有司縱之太過

使然也。今而後賞必有中罰。則臣任其咎。已蔡城陷。仲德赴汝水死。將士五百餘人皆從死。莫有異志者。世言將嚴士不附。觀此可以知其言謬矣。

李西涯有句云。本朝科第重三元。按金孟宗獻發解府試。省試廷試俱第一。號孟四元。觀此可以知此句不落空矣。

元史載湖州長興縣有金沙泉。泉不常出。唐時

用此水造紫荷茶進貢有司具儀祭之始得水
事訖卽涸宋末屢浚治泉不出是時帝遣官致
祭一夕水溢可溉田千畝所司以聞帝賜名爲
瑞應泉此泉本朝久涸近朙月芥茶盛行此泉
復溢出然曾爲胡虜役不足重芥矣

今當事者堅言西域曆法精思未敢盡信也觀
元時西域曆人有奏五月望月當蝕者楚材曰
否卒不蝕朙年十月楚材言月當蝕西域人言

不蝕卒蝕八分可以驗矣

郭律楚材初定賦稅每二戶出絲一斤以給國
用五戶出絲一斤以給諸王功臣湯沐之資中
田稅每畝二升上田三升下田一升水田每畝
五升商稅三十分而一鹽價銀一兩四千斤此
特鹽價太賤無爲其他使後世能遵之萬世之
利也

元英宗遇弒後卽位詔曰薛禪皇帝可憐見嫡

孫裕宗皇帝長子我仁慈甘麻刺爺爺根底封
授晉王統領成吉思皇帝四箇大幹耳朵及軍
馬達達國土都付來依着薛禪皇帝聖旨小心
謹慎但凡軍馬人民的不揀甚麼勾當裏遵守
正道行來的上頭數年之間百姓得安業在後
完澤篤皇帝教我繼承位次大幹耳朵裏委付
了來已委付了的大營盤看守着扶立了兩箇
哥哥曲律皇帝普顏篤皇帝姪碩德八剌皇帝

我累朝皇帝根底不謀異心不圖位次依本分
與國家出氣力行來諸王哥哥兄弟每衆百姓
每也都理會的也者今我的姪皇帝生天了也
麼道迤南諸王大臣軍上的諸王駙馬臣僚達
達百姓衆人商量著大位次不宜久虛惟我是
薛禪皇帝滴派裕宗皇帝長孫大位次裏合坐
地的體例有其餘爭立的哥哥兄弟也無有這
般晏駕其間比及整治以來人心難測宜安撫

百姓使天下人心得寧早就這裏卽位提說上
頭從着衆人的心九月初四日于成吉思皇帝
的大幹耳朶裏大位次裏坐了也交衆百姓每
心安的上頭赦書行有此其本色文章也中華
何故相率而臣此輩豈不惡死諸君子猶不努
力安攘乎

余嘗言天下道路兵家之扼要如蘇生之揣摩
至矣然皆在局以內唯用海則在局外而首尾

皆應雖南北萬里而敵不能防觀金履祥儒者
也于南宋迫襄鄧之時請發重兵繇海道直趨
燕薊以擣其虛則襄樊之師不攻自解且備具
海舶所經郡邑與巨洋難易遠近歷歷可據宋
終算能行其後朱瑄張清獻海運之利所繇海
道視履祥所上書咫尺無異云後世之士亦當
思余言矣

覽

曉

曉

曉

曉

曉

曉

曉

曉

曉

曉

曉

曉

曉

曉

曉

曉

曉

曉

曉

曉

曉

曉

曉

野航史話